

el regno de Murçia, et al conçeio et caualleros et omnes buenos de la çibdat de Murçia, salut et graçia.

Sepades que Diego Gomez et Bonanad de Balebrera, vuestros mandaderos, venieron a nos et mostraron a nos vn quaderno, sellado con vuestro sello, en razon de los robos et tomas et dannos et muertes et catiuazones que uos auia des reçebidos de los moros. Et nos, por esta razon et por otras cosas que eran nuestro seruiçio, enbiamos al rey de Granada a Diego Martinez, de la nuestra camara, et diemosle el quaderno que nos enbiastes para que lo mostrase al rey; et de la respuesta que ende ouieremos fazeruoslo hemos saber et enbiaruos hemos mandar commo fagades porque ayades hemienda de los males et dannos que reçebiestes.

Otrosy, sabet que fablamos con estos vuestros mandaderos sobre todas las otras cosas que aca los enbiastes, et ellos vos diran lo que nos les mandamos que uos dexiesen.

Dada en Valladolid, XXVII dias de setiembre, era de mill et trezientos et setenta annos. Yo, Alfonso Ferrandez, la fiz escreuir por mandado del rey.

### CCVIII

**1332-IX-27, Valladolid. Mandato real de Alfonso XI al concejo de Murcia, ordenando que entregasen a Alfonso Fernández de Saavedra, comendador de Aledo, los 3.100 maravedís de la tenencia del castillo de su encomienda. (A.M.M. C.R. 1314-1344, f. 91v. Pub. Torres Fontes: "Los Fajardo", pp. 173-174.**

Don Alfonso, por la graçia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. Al conçeio et a los alcalles de la çibdat de Murçia, salut et graçia.

Sepades que Diego Gomez et Bonanat de Valebrera, vuestros mandaderos, nos dexieron que Alfonso Ferrandez de Saavedra, comendador de Aledo, que auia para retenencia del dicho castiello, en las rentas que la Orden de Santiago ha en la dicha çibdat et en su termino, tres mill et çient maravedis. Et que agora el maestre de Santiago que enbiara rogar a los alcalles que eran a aquella razon que feziesen recudir a Pedro Lopez Fajardo, su criado, con los dichos maravedis et non a otro ninguno, et que el dicho Alfonso Ferrandez, comendador, que prendara por los dichos maravedis a algunos vezinos de la dicha çibdat. Et pedieron nos merçed que mandasemos recudir con los dichos maravedies al dicho comendador.

